



Sak:

Vår dato:

Vår ref.:

Til:

Saksbehandlar, innvalstelefon

Kopi til:

Notat om grensejustering

Vedtaksmynde

Saker om justering av kommunegrenser blir avgjort av departementet. Statsforvaltaren gjer vedtak i mindre saker om justering av kommunegrenser når det er semje om ei løysing. Kva som er ei mindre sak, må vurderast i kvart enkelt tilfelle. Tal innbyggjarar og storleik på området det er aktuelt å regulere, er viktige kriteria for vurderinga.

Initiativ til grensejustering

Søknad om at det skal setjast i gong utgreiing om grensejustering kan fremjast av innbyggjarar og grunneigarar i dei kommunar søknaden gjeld, av næringsdrivande som har sin registrerte forretningsstad der og av kommunestyret i dei kommunane søknaden gjeld. Søknad om grensejustering kan gjelde eit område som ligg i den kommunen ein har tilknytning til, men kan også gjelde overføring av eit område frå ein annan kommune. Departementet har initiativrett i alle type saker. Statsforvaltaren har ikkje initiativrett i inndelingssaker.

Krav til søknaden

Søknad om at det skal setjast i gong utgreiing om grensejustering skal vere skrifteleg og grunngjeven, og må innehalde framlegg til nye grenser. Søknaden skal sendast til Statsforvaltaren. Statsforvaltaren skal så snart som mogleg orientere kommunane om søknaden. Organet som tek avgjerda (departementet eller Statsforvaltaren) er ikkje bundne av framlegget frå søkjaren. Resultatet kan bli ei større eller mindre endring enn initiativtakarane hadde tenkt seg.

Utgreiing

Inndelingslova seier ikkje noko om kor stor vekt det skal leggjast på dei ulike momenta i ei sak om grensejustering. Den som står ansvarleg for utgreiinga, må avgjere kva som er «nødvendig» å utgreie i den enkelte sak. Det går fram av Ot.prp. nr. 41 (2000 – 2001) at opplysningar om folketal, areal, geografi, topografiske tilhøve, kommunikasjonstilhøve og plangrunnlag i kommunane kan vere viktig å innhente. Departementet tilrådde i forarbeida at følgjande opplysningar kan vere aktuelle å innhente i saker av større omfang: Demografiske utviklingstrekk, flytteaktivitet, pendling, næringsstruktur, næringsutvikling, utbyggingsmønster, arealbruk, inntekts- og utgiftsstruktur, kommunalt tenestetilbod og interkommunalt samarbeid.

Høyring av innbyggjarane

Inndelingslova § 10 fastset at kommunestyret som utgangspunkt skal innhente synspunkt frå innbyggjarane i kommunen om grensejusteringar. Høyringa kan skje ved folkeavstemming, innbyggjarundersøking, møte eller på anna måte. Det er opp til kommunen å vurdere om det er nødvendig å innhente synspunkta frå innbyggjarane. Kommunen har ikkje plikt til å grunngje kvifor innbyggjarane ev. ikkje blir høyrte.



Dersom det aktuelle området kryssar kommunegrensa, kan det blir aktuelt for fleire kommunar å halde høyring. I så fall er det ein fordel om prosessane blir samordna. Kommunen er ikkje bunden av resultatet av høyringa når den skal gje tilråding i saka. Det er i siste instans den som har avgjerdsmynde som avgjer kva vekt den vil legge på resultatet av høyringa.

Kven skal høyrast?

Inndelingslova § 10 er avgrensa til innbyggjarane i *det aktuelle området*. Ei sak som geografisk berre vedkjem ein liten del av kommunen, kan og få verknader utanfor området saka direkte gjeld. Kommunestyret avgjer sjølv kven som skal omfattast av høyringa.

Lenkjer:

[Inndelingslova](#)

[Inndelingsloven - regjeringen.no](#)